

葉恭綽 編

全清詞鈔

下
冊

中
華
書
局

葉恭綽編

全清詞鈔

下冊

中華書局

全清詞鈔第二十五卷

張丙炎

字午橋，號藥農，一號榕園。江蘇儀徵人。咸豐九年進士，改庶吉士，授翰林院編修，官廣東廉州府知府。

有冰甌館詞鈔一卷。

菩薩蠻

湖上

瀕湖花是今年好。泛湖人比前年老。一鷺立汀洲。相看兩白頭。采蓮歌唱徹。心事終難說。雙槳夕陽中。花輸人面紅。

浣溪沙

湖上草堂初成，同人約於九日集長春嶺登高落之，阻雨不果，會飲勺園，研山作圖徵題，用漁洋

韻譜此。

山自青青水自流。綠楊城郭忽驚秋。今年重九在揚州。往歲曾客淮陰。籬菊纔黃佳節過。滿天涼露助新愁。那堪重問十三樓。

煙水迷濛阻畫橈。碧波空漾赤闌橋。酒邊英氣藉花消。月觀風亭秋瑟瑟。吹臺琴室路迢迢。愁心時逐去來潮。

蘭陵王

柳影

夕陽薄。低照陰陰院落。鞦韆外、微見幾絲。惹恨牽愁瘦如削。飛花陣陣落。尋樂兒童誤捉。端詳看、人字宛然。欲下珠簾又還閣。前游記京洛。拂禁苑河橋。車轂交錯。喬柯宵靜沈魚鑰。看閭闔迎曉。火城初近。紅牆描上楚腰弱。又誰識飄泊。孤酌。映羅幕。漸吐出銀蟾。風裏梳掠。眉痕眼態春如昨。有靜息枝杪。兩三烏鵲。闌干移上。夜雨過。又隱卻。

陳倬

字培之。江蘇元和人。咸豐九年進士。官戶部郎中。有隱蛛齋詞稿。又名香影餘譜。

疎影 枯樹

寒雲凍墨。鎖病枝。偃蹇螺黛無色。矗影杈枒。霜月荒涼。空山夜鬼愁泣。文章不露虬鱗古。聳健骨、參天千尺。早絢紅。脫下楓林。鶴鶴怒盤巖壁。疑是平蕪畫幘。薺痕量蒼上莽。何限淒碧。獨對西風。如此婆娑可奈天涯行役。江南觸起蘭成怨。笑禿鬢、一般蕭瑟。問甚時、潛茁瓊蕤。豔說好春消息。

梁鳴謙

字禮堂。福建閩縣人。咸豐九年進士。官吏部主事。

摸魚兒 漁燈

正黃昏、一番微雨。溪雲收卻無數。夜潮乍長涼風峭。間出一星魚步。低望處。倚兩兩輕舟、伴著閒鷗鷺。蒼茫煙樹。有暗裏歸人。隔江扶蓋。照影正呼渡。幾回覷。恍惚似移還住。菰蘆深淺低護。平波正好開漁網。

波底魚蝦爭赴。休回顧。問一棹故鄉、何處停沙渚。相看最苦。忽夜半鐘聲、霜痕滿被。夢醒記吟句。

魏熙元

字玉巖，浙江仁和人，咸豐九年舉人，有玉玲瓏館詞存口卷。

風蝶令

半面玫瑰笑。三生豆蔻詞。叮嚀攜手下階時。不信今年情比、舊年癡。出谷鶯違約。歸巢燕爽期。惜花心被妒花欺。拋了相思芍藥、采將離。

鬲谿梅令

倚欄無力笑東風。惜忽忽。花到酴醾、蝶夢也惺忪。尋芳春興慵。思量贈別表情濃。卻愁儂。一幅蠻箋、和淚手親封。開時揩眼紅。

宋謙

字已舟，福建侯官人，咸豐九年舉人，有鐙昏鏡曉詞四卷。

定風波

漁燈

卸輕帆，斷港人稀。愁雲黯黯向夕。舵尾傳餐，篷陰坐酒，一破黃昏寂。碧波心，小紅濕。冉冉孤煙散寒荻。誰識。是鷗邊雁外，宵來秋色。晚潮正急。更星星，碎點漁天擲。甚鄰船無賴。寒篝夢醒。起弄滄浪笛。賺蛟龍。暗中泣。幾陣江風忽吹息。愁極。半艙殘月。憑誰收拾。

王彥起

原名起，字硯香，浙江錢塘人，咸豐九年舉人，官會稽教諭，有淨綠軒詞六卷。

南樓令

春霧黯啼鳩。春聲繞畫樓。望江南、綺夢全收。紅到桃花青到柳，排著了，教儂愁。 已譜舊風流。誰歌水調頭。懺聰明、身世悠悠。牆外琵琶牆裏月，渾不似，故園秋。

金縷曲 添線詞

一縷春痕逗。費工夫、較量長短。儘伊纖手。漸喜紅閨舒旭景，恰稱圖開九九。道莫把、天公辜負。學刺鴛鴦忙裏覺。算明朝、比翼應成就。須緩緩。駐晴晝。安排自試金鍼繡。擬癡心、駿鳥繫住。情絲牢扣。巧樣徐抽機上錦。消息箇儂知否。問何處、篝燈寒守。似水年華頻壓線。怕光陰、雖好人非舊。撩亂緒。向誰剖。

曹鍾英

原名毓英，字子千，一字紫荃，江蘇吳縣人，咸豐九年舉人，官浙江同知，有勘梅館詞。

長亭怨慢

是誰傍、高樓橫笛。幽咽風前，離魂銷得。短鬢蕭蕭者，番顧影共淒惻。葉乾絲盡，都皺了、荒寒色。鴉點散零星。又風雪、江邨畫出。蕭瑟。看垂垂幾樹，一樣酒帘飄直。藏鶯掠燕，怕記著、冶春踪跡。便斜照、紅上闌干，熨不暖、幾絲愁碧。算來歲春濃，只隔玉聰消息。

長亭怨 殘紅和實甫

聽前夜杜鵑啼斷。血淚模糊。枝頭灑徧。狼藉香堦。箇儂生怕卷簾看。朱闌低亞。扶幾縷芳魂倩。無復是濃春。只空憶東風人面。零亂認蒼苔點點。澹照斜陽一半。綠陰圍繞。漸隔着畫樓天遠。最憐他燕子多情。和飛絮銜來宛轉。把賸粉零脂。留向秋千池館。

宋家蒸

字雲甫。江西奉新人。咸豐九年舉人。官四川峨眉縣知縣。有譜杏軒詞草四卷。

飛雪滿羣山 梨花

刻玉爲膚。鑲冰作采。糝來晴雪輕勻。玉奴嫁晚。瑤臺夢曉。等閒度盡芳春。雨餘知有恨。搵難住。溶溶淚痕。喜晝陰薄。分明照眼。素袖白羅裙。頻寄語。東風須護惜。看輕輕態度。淡淡丰神。羽衣千仞。明珠十斛。忍教散作香塵。化身空色裏。且團入。花魂蝶魂。怕良宵誤。清風皓月難遇君。

潘遵璈

字子繡。號譜士。江蘇吳縣人。咸豐九年貢生。有小寶洲笛弄。鶴唳瑤天譜。共四卷。總稱香隱齋詞。

採芳信

樓陰殢夢。簾波盪春。小憩園林。感吟成調。

步幽窈。正柳眼開初。花魂醒了。算一年芳事。閒中占多少。夕陽樓閣遲歸燕。簾卷人偏悄。訴柔情。絕似游絲。向空斜裊。天氣嫩晴好。怕謝盡茶蘼。錦書還渺。試問東風。能否把愁掃。闌干曲。象同誰倚。淚染紅心

草。暗銷凝。不信嬉春尙早。

踏莎行 和晏同叔

細草生齊。輕塵舞徧。秋千樹隔深深見。玉人小病怕風尖。下簾故掩芙蓉面。枝上啼鵲。梁間語燕。韶華似夢年年轉。梨花帶雨又紛飛。不知落在誰家院。

倚風嬌近 落花

紅褪啼妝。杜鵑聲裏腸斷。一年春事忽忽換。風雨昨宵聞。愁煞倚樓人。散了香魂。尙倩游絲低捲。凝想多時。難寫秋娘淒怨。留客金尊重款。賸粉零脂賦情倦。閒庭院。畫闌但壓斜陽滿。

垂楊 秋柳

章臺舊路。甚春情換了。秋情無數。一角殘陽。可憐猶照舊眉嫵。飛鴉歸向梢頭聚。謾贏得。瘦痕如許。最銷魂。臨別攀條。唱柳郎詞句。休憶青青前度。蘸流水半隄。倦腰難舞。繫馬人來。幾回惆悵和烟語。西風便解梳千縷。總不似。少年張緒。沉聲聲。又聽寒蟬吟漸苦。

西窗燭 秋燭

銀蟾影沒。寶鴨香殘。燭奴還對愁客。乍明乍滅。渾難定。憐救盡飛蛾。玉釵倦剔。便鬪妍。頃刻花開。輸與嬉春那夕。伴岑寂。祇向更闌。銅盤垂淚。帳裏依稀暈入。料他碁子閒敲處。也一點熒熒。搖成黯色。等恁時。聽徧歸鴻。寒雨簷前尙滴。

王星誠

原名于邁，又名章，字平子，更字孟調，浙江山陰人，咸豐九年副貢，有西臯山居殘草，附詞一卷。

望江南

念西臯山居作

山居好。門外野梅春。縛篋讓根流水路。折枝橫髻過年人。香意隔溪新。
山居好。時節又梅黃。醉覓解談鍾進士。水村多唱蔡中郎。踏月下前岡。
山居好。新榨酒香微。暖窖花如嬌女瘦。春盤橘似粉奴肥。燒葉閉柴扉。
山居好。幾處負暄同。矮屋書聲開小學。地爐閒話就村翁。餘味耐冬烘。

林天齡

字受恆，又字錫三，福建長樂人，咸豐十年進士，改庶吉士，授翰林院編修，官至翰林院侍讀學士。

念奴嬌

憶燕

春愁難說。又今年寒食。雨絲風片。寂寂簾櫳如水洗。腸斷舊遊亭院。紅線綠慳。烏衣夢杳。長日空巢掩。泥痕無恙。柴門花事誰管。苦憶起早歸遲。衝煙拂水。幾度曾相見。舊語呢喃聽已熟。猛被西風吹斷。日短襟寒。雪深羽薄。遼海應何戀。倘勞寄訊。故人餐飯猶健。

南浦

秋草

野闊綠煙低。乍一夕、新霜染出秋色。斜照下平蕪。萋萋處、一例無情慘碧。王孫去也。歸期只恨天涯隔。蝶

魂難覓。空悵望南園。飛花無迹。簾鉤依樣銷魂。指一道裙腰。芳華暗擲。春夢化流螢。賸南浦、前度綠波如織。風傳雨倦。馬蹄狼籍。憑誰惜。紫臺何極。問青塚埋香。有無消息。

劉滄年

字蜀生，號樹君，又號約園，順天大城人。咸豐十年進士，改庶吉士，授翰林院編修，官廣東惠州府知府。

有約園詞二卷、

苦陸蠡，用飛卿韻

紅樓畫燭金鷄潮。依稀人影紗幮碧。一樹紫花梨。春風吹上枝。酒痕濃笑壓。曉夢迷胡蝶。一樣好芳菲。愁人到眼稀。

銀箏一曲秦娥憶。殘紅嬾娜春無力。十里草萋萋。誰家征馬嘶。雙蛾愁斂翠。點滴壺中淚。不用曉鶯啼。遼西夢已迷。

吳唐林

字子高，號晉王，一號蒼綠，江蘇陽湖人。咸豐十一年舉人，官浙江候補知府，有橫山草堂詞一卷，又刻

侯鯖詞五卷、

疎影 武清道中、見楊花作、

玉關消息。又長條作絮。搖亂春色。幾日濃陰。和雨和煙。吹起滿空晴雪。東風不解傷春思。更誰綰、天涯離

別。算一年一度飄零。唯有倚樓人識。行盡短長隄畔。問旗亭舊曲。誰譜羌笛。陌上雙輪。一樣花開。不是踏青時節。萍蹤未肯隨流水。卻繞住。遊絲千尺。透征衫。料峭寒輕。生恐裝棉無力。

沈景修

字汲民，號蒙叔，浙江秀水人。咸豐十一年拔貢，官壽昌縣教諭，有井華詞二卷。

一萼紅 題家祥叔瑞清蘿庵憶月圖

倚牆根。有藤陰窈窕。幽綠鎖閒門。互竹編籬。通泉引沼。鱸篆輕漾簾紋。最難忘、涼宵似水。呼月上、留客倒芳尊。悴葉零秋。疏花媚夕。容易黃昏。惆悵紅羊浩劫。莽家山焦土。無計逃秦。草沒頽垣。苔封荒甃。蛩語空弔斜曛。歎多少、分飛旅燕。認香泥、猶戀舊巢痕。擬泛清溪簪晝。載酒尋君。吳興有鼇竇溪，兩岸多朱藤，吾鄉同姓皆出休文公裔。

鷓鴣天

病酒光陰繡幕垂。愁痕深淺翠顰知。傷心花落春三月。照面萍開水一池。風翦翦。雨絲絲。無人庭院燕雙飛。爲誰消瘦看衣帶。正是苔階小立時。

賣花聲

何處小紅樓。放下簾鉤。隔窗蕉雨夜颼颼。一滴一聲聲不斷。白了人頭。裙屐記前游。挈鷺盟鷗。杭州夢醒又蘇州。似水韶華東去也。怎肯西流。

祝英臺近 秋蝶

暑紋移。鑪篆冷。午睡北窗醒。手擘蠻箋。几席喜清瑩。最憐小蝶情癡。背人偷墮。卻誤認、畫屏花景。棲乍定。趁伊栩栩游仙。替寫彩衣觀。倚翠偎紅。舊夢忍重省。怎禁粉褪涼煙。殘英尙抱。早瘦怯、一絲風勁。

踏莎行 題宗載之得福陌上尋鉤圖

草長紅心。桐垂碧乳。香車塵碾湖邊路。平波飄瞥見驚鴻。春山依約通眉語。翠羽音沈。錦衾夢阻。今宵酒醒人何處。重來崔護已銷魂。杜鵑啼過西冷去。

張鳴珂

字玉珊，一字公東，晚號竄翁，浙江嘉興人，咸豐十一年拔貢，官江西義寧州知州，有寒松閣詞四卷，國

朝詞續選一卷

南浦 春水，用山中白雲詞韻

谿雨夜廉纖。趁東風、著力溶溶流曉。新漲漸平堤。垂楊外、一帶林塘如掃。偷窺鏡面。理妝十五漁娃小。南浦那時曾賦別。腸斷綠波春草。年年開徧桃花。數江鄉、又是鰕魚肥了。杜若暗生香。汀洲畔、可有辜芳人到。烟波杳眇。瀟裙佇立風前悄。回首畫船天上坐。載得落紅多少。

綺羅香 和羊辛楣復禮韻

蝶夢剛回。蠶絲盡吐。多少纏絲吟緒。青鳥傳言。又報碧雲期誤。畫簾半、飛絮偏縈。曲闌外、落花無主。看熏

鑪、心字香銷。迢迢蓮漏夜如許。紅牆遙指一抹。猶記雙雙拜月。嫦娥應妬。彩筆攜來。替寫十眉新譜。歎團扇、漸欲捐秋。問桃葉、幾曾名渡。任拋殘、紅豆相思。斷腸人共語。

甘州

甚年時、蹤迹似浮萍。東風又天涯。望鄉關渺邈。羊車再到。開落桃花。可是棲香願滿。疏雨冷琵琶。忍聽哀蟬曲。愁鬢都華。記得鳳階橋畔。展眉斂殘月。同倚窗紗。道尋春未晚。仙夢碧城遮。翦淞波、綠蕪千里。誤幾回。燕子傍誰家。魂歸也。有垂楊處。啼煞昏鴉。

長亭怨慢

題王夢湘太守以憇柳泉選夢圖

又消受、纖腰低舞。盼到春來。柳絲盈路。夕照明邊。好山依約露眉嫵。夢痕無據。頻繞徧、門前樹。聽雨記高樓。隔幾扇、銀屏難度。薄暮。便移船載酒。試問鵲華何處。晶簾月上。漫扶醉、踏歌歸去。算只有、舊曲飄零。奈同是、天涯羈旅。願化作浮萍。腸斷東風吹絮。

陶

然

字藜青、號芭孫、江蘇長洲人、咸豐十一年拔貢、有蜺江漁唱一卷、亦稱味閒堂詞鈔、

一枝春

詠白桃花

悄倚東風。笑吟吟、別有一枝嬌倩。幾痕清露。喜得鉛華淨浣。巧翻新樣。把寸寸、冰綃碎剪。只怕他、玉蝶雙雙。飛入花叢難辨。何時更逢人面。數年來、崔護。鬢絲已變。仙源可訪。那復輕紅塵戀。經春愁雨。慣粉淚、

無言偷濺。倘不有、簾外銀蟾。芳心誰見。

費丹旭

字子君、號曉樓、又號環溪、浙江烏程人、有依舊草堂詩、附詞一卷、

步蟾宮

寶釵斜亸新妝淺。翠簾底、湘波自卷。小窗昨夜雨聲寒。漸成了、秋陰池館。綠天無際愁無限。幾度欲吟又倦。擬將心事比芭蕉。願一葉、一番舒展。

月上海棠

一番杏雨簾櫳曉。更幾番、梨雪倩誰掃。寂靜重門。燕差池、窗開窈窕。分明似、碧玉年華最小。香雲彈鬢梳妝巧。入時無、展轉菱花照。如此春寒。怎禁他、綠遲紅早。何心問、昨夜花落多少。

楊後

原名得春、字師山、江蘇上元人、諸生、有柳門詞、

琵琶仙 題王雨嵐七星巖探梅圖

一臥滄江。早閒了、踏雪尋詩雙屐。雞黍相約登臨。層雲盪胸臆。煙樹外、斜陽一片。漸紅破、亂山愁碧。斷壑流泉。疏花映水。塵夢無迹。甚贏得、身似浮鷗。況都是、江南舊遊客。回憶去年何處。又今年春色。偏不奈、當歌對酒。說故園、別後消息。夜月還照梅邊。那堪吹笛。

許光清

字雲堂、號心如、浙江海寧人、歲貢生、

醉桃源

題蔣生沐戴笠圖

筍鞋欒帽稱山居。偏宜野服疏。千秋金石百家書。前身應蠹魚。開竹徑。嘯蓬廬。牢騷習未除。長安相識自乘車。相逢一任渠。

踏莎行

題費子苕背立美人雙燕扇

芳草初齊。斜陽欲暮。妝成一段尋香路。銜花雙燕正來時。踏青未怕羅裙汗。嬋柳纖腰。迴蓮細步。佳人太惜傾城顧。祇應回首易春歸。等閒不受東風誤。

許光治

字龍華、號鬻梅、一號穗稿、浙江海寧人、廩貢生、有江山風月譜一卷、

好事近

詠鬢邊花、同張子祥韻、

膩雪擁銀翹。恰愛晚來香透。玉鏡臺邊初整。壓雙鬢雲覆。醉來山枕小橫陳。釵重半邊溜。可惜夜闌開盡。又卸妝時候。

湘春夜月

費曉樓寫棲鴉流水詩意

記秦淮、板橋舊日人家。相望曲曲清溪。十里暮雲遮。幾樹淡黃疏柳。祇半籠斜日。牕鎖殘霞。渺秋光何處。

西風點出。流水棲鴉。十分蕭瑟。斷腸司李。詩鬢空華。寡女絲寒。爭奈是、哀音一縷。淒絕琵琶。機中織錦。更有人、愁憶天涯。何況又、白門暝色。烏啼欲隱。已少楊花。

沈

吾

字旭庭、江蘇無錫人、有蓉湖漁笛詞、

點絳脣

燕子歸來。海棠紅褪春將暮。倚闌無語。一院茶蘼雨。人去天涯。夢也無憑據。將誰訴。亂愁如絮。飛徧江南路。

百字令

爲宗湘文題江天曉角圖

六朝形勝。對金焦兩點。江流一碧。嗚咽戍樓聲不斷。早把夢雲吹溼。星捲旌旗。霜凝笳鼓。天際神鴉黑。煙零亂。故園芳訊遙隔。曾記返棹江南。青山依舊。轉瞬成陳迹。舞榭歌臺何處問。賸了斷戈殘戟。庾信清愁。蘇公俊賞。俯仰悲今昔。酒邊話舊。何堪前事重憶。

宋恭敬

字勝吉、號惺甫、浙江桐鄉人、有拜石齋詞一卷、

高陽臺

秋日、小步慶壽庵卜孟碩先生讀書處、

斷渚橫舟。連畦植杖。依依幾室村農。古柳疏簷。茅庵曲徑微通。蓬門半掩無人到。但欹牆、露萼凝紅。渺前

蹤。野鶴孤飛。幾植吟筇。摩挲不盡低徊意。悵文窗蛛網。篆碣苔封。三百年來。蕭然誰繼清風。商量琴硯從安頓。有白雲。遍戶留儂。儘從容。楚些悲歌。好和疏鐘。

瑞

璵

字仲文，富察氏，滿洲旗人，官福建布政使，有一鏡堂詩餘。

點絳脣 春宵

沈醉初醒。宦情似水飛雲軟。柳枝花片。簾外春風捲。一樹桃花。飄落閒庭院。無人管。霑泥貼蘚。點點春愁慘。

秦代馨

字薦香，四川合州人，有薦香遺稿。

醉春風

遠樹綠成幄。修篁青入閣。十分春色一分無。錯。錯。錯。柳約花期。燕昏鶯曉。等閒拋卻。鳥向枝頭說。也似尋春腳。癡心欲倩喚歸來。莫。莫。莫。芳草青時。落花紅外。山光如昨。

傅

霖

字雨純，一字雨人，浙江山陰人，有夢蘊樓詩鈔，附詩餘。

點絳脣 明湖偶泛

全清詞鈔 第二十五卷 宋恭敬 瑞璵 秦代馨 傅霖

一二七三